

劉繼莊先生廣陽雜記

劉繼莊先生廣陽雜記卷之四

舟過中湘石頭洪涵齋立鵠首呼予出言此地偽周
甲五百人駐此以絕其糧餉有舟過以巨炮打之後
遠孤軍不能久駐即撤回今其上猶有寨基存焉有石灘橫截
江中曰過江龍其上為柞樹市

德山在常德龍潭在澧州為山在寧鄉德山為山今日規模尚
在

何楷字玄子思文時曾彈鄭飛虹并及賜姓玄子歸為盜所傷
截其耳人云鄭氏使人為之何鄭自此為世仇矣後賜姓据厦
門有人來問玄子必捕之其弟三子常涕泣而諫其父人皆知
之玄子死二公子為其姓所禽置之獄中因曾勸其父也得以此

不死勒令造鐵甲千二百副而後釋之。比校時曾受刑杖玄子著有周易訂詁奇書也。

○鄭飛虹幼姣好其父為府吏時知府蔡善繼園有荔支樹飛虹同其弟自牆外以石打荔支誤中善繼之頭善繼怒呼其父子至一見飛虹而怒解後飛虹承其後母某氏其父欲殺之逃往海盜李旦舟中有寵于旦旦死欲置主卜之于神飛虹卜皆吉遂立以為主其弟莽二名之豹泉勇絕人遂雄踞海上弟之彪後改名馮遠。

楊晉叔夫人郭氏也父名郭義與陳秀皆飛虹同事人鼎足而立者也後不相歸能誠後皆世襲精奇尼哈番夫人因長沙之亂令家避居于官山四王兵至搜山家人皆走夫人獨不去有

縊死。後晉叔于星沙大作佛事。以資冥福。僧以旛往官山招魂。有鳥如燕而長尾。隨旛飛至星沙。棲庭樹上。每旛繞壇。鳥輒隨旛飛。轉畢。復棲樹上。凡三日夜。佛事既畢。化欲送佛訖。即飛向官山而去。夫人平日事姑事夫。孝謹脩至。直乎有此靈異也。涵齋嘗為之立傳。

王明亦閩人。在廣西提督馬雄標下為參將。孫延齡之攻柳州。雄較敗。雄素輕明。忽自薦請以三百騎往衝其營。雄初不許。後聽其以百五十騎往。諸廷齡營。四層而返。不失一騎。延齡自比不支。而明聲震粵西矣。

李卓吾。晉江人。為府前李氏與林氏同宗。蓋其祖本姓林也。故泉人有林李同宗之語。今李厚庵乃其族人。

○賜姓攻金陵之前經營海上舟泊華山山在晉院之東有雞山
華山雞山一山皆雞羊山皆羊也其地有龍不可泊賜姓曰吾
有命在天龍何能為事苟可成自有百靈擁護不成死此耳舟
泊金鼓作龍起震盪見紗帽紅袍人揖賜姓上小舟風吹小舟
上岸得不死舟覆甚衆精銳十喪五六矣

世廟時有呂四官以力聞為暴于鄉不容于閭閻走海上即倭
時入寇四十餘年後年八十矣更來閩省其父母墳墓人皆不
識曰吾呂四官也流寓他鄉久今暫一歸省耳即公人亦不敢
蹤跡之

衡山之大堡烟火二百零八家行旅之市井也
抽出閩廣益橙類大如巨升色黃如梨案柚一曰櫟亦曰條唐

本艸曰：壺柑，食性曰臭橙，亦曰生藥。李時珍曰：柚色油然，其狀如卣，故名。壺亦象形。今人呼其黃而小者，正此意也。柚樹葉皆似橙，其實有大小二種：小者如柑，橙大者如瓜如升，有圓及尺餘者，亦橙之類也。今人呼為朱欒，形色圓正，都類柑橙，但皮厚而粗，其味甘，其氣臭，其脾堅而酸，其萼甚香。南人種其核，長成以接柑橘，云甚良也。尔雅有櫟，音廢。郭璞云：櫟，大柚也。范成大云：廣南臭柚，大如瓜，可食，其皮甚厚，染墨打碑，可代鹽制，且不損紙也。爾雅亦曰：櫟，音賈。列子云：吳越之間有木焉，其名為櫟，碧樹而冬青，實丹而味酸，渡淮而北而為枳。廣雅謂之櫟柚，櫟亦柚也，皆此物耳。予在衡州時買而食之，亦可口也。

予在衡署中，度歲日，閨室中競擲毬，官園喧笑，不知此中有何。

意味而諸公耽之至此予欲取兩漢魏晉南北朝隋唐宋元之選舉職官各為陞宦圖一紙陞官圖說一冊置學舍中節日暇時病餘課畢以此消遣父之而歷朝選舉職官考課銓選之法皆了了矣亦讀史之一助也賢于博奕遠矣

癸卯年工部題清河縣仲家莊開迄下陶家莊地方建一石閘估計銀三萬四千九百二兩零此閘與仲家莊相去不遠今該閘近近無策新建閘擬名康濟仲家莊石閘改名廣濟奉旨依議

舊春上元在衡山縣曾臥聽采茶歌賞其音調而于辭句情如也今又衡山于其土音雖不盡解然十可三四領其意義因之而歎古今相去不甚遠村婦稚子口中之歌而有十五國之章

法顧左右無與言者浩歎而止

川陝總督佛倫壽秦第四疏謹陳潼關收糶米糧請勅鄰省督撫動帑招商販抵關亟濟被災兵民事戶部議于潼關地方選委賢能道廳等官酌動損納銀兩隨米價消長收買再令直隸山東河南山西湖廣五省督撫各動庫銀十萬兩招殷實商人給發令于糧賤處無論米穀麥豆收買抵潼關糶賣其多出利息不計止將原給本銀收取可也 旨依議

紫庭家廢書奩甚多委積僻角以飽蛇鼠耳虞臣取而裁之製成研匣一傳會之以膠漆錦不可得即以油紙飾其外下藏小匣可以貯墨函蓋相稱廉隅端直儼然成器矣自此與吾周旋晨光夜火形影相接又不知其歷幾年月也夫天下之良材佳

質委之無用之地者不知何限念之惻然

川陝總督佛倫奏欽奉上諭將西安納米事例移在商州損納而西安在于司庫止令損銀但損納米石數目如仍照三十一季八月以後十分之數每石折銀六兩損納恐數多而損納者少將請西安損納仍照三十一季八月以前以十分減四每石折銀六兩准予西安司庫損納至于商州既通水路其損納米數應照三十一季八月以後之例在西安則納銀者衆而商州得以積貯不糧矣

工部題請 昭陵寢殿傾 請重建造 旨依議

山西巡撫葉題欽奉 上諭截留漕糧二十萬石分貯秦晉蒲州等處布政司舒書併兩省之員在孟津等處公同斛米運至

觀音堂交晉接運兩省官員于潼關蒲州等處公同解交先將秦省應贍之米十萬石于十二月初三日運至蒲州等處同豫員交兌取獲秦晉贍米之韓城朝邑華陰潼關衛並晉省贍米之蒲州榮河臨晉各收米實收詳報

東壩有上下二壩上壩地名廣通鎮有小石碑言地古名良林鎮初築隄以障水易今名其地四通八達東至鄧州無錫西至高淳蕪湖南至廣德思安北至溧水江寧南至溧陽宜興東北至金壇丹陽西南至宜興西北至太平府向無此壩宣歙廣德建平諸水一由蘇州出劉家河一由吳江出松江入海洪武初水沒吳中田禾戶部題請築壩引水由太平蕪湖入于江遂將高淳黃池一帶田沒成湖其地糧稅加派于蘇松二郡辦納案

此壩顛末尚未究竟當于地志暨實錄中政之

梁山即所謂天門山也二山橫截江中東西對峙正當采石西南天設此山為金陵門戶踰踞江邊如二鐵虎隔江眈眈相向山上長松古柏鬱然參天山後人家參差隱見于松柏中風帆盤于兩山之間予以玻璃鏡照毫髮皆見

采石鎮閭閻相接不下萬家臨河人家隙地皆接以白石欄楯壯麗如畫此天下所無也

立人言江行順風至六百里則釘板俱熱不可復行行則虞其敗矣虞臣未信其理予為之往復推論始得豁然

采石磯有災犀亭晉溫嶠然犀照水處此事史載甚詳予嘗思之不得其解古今相傳如此類者多皆別有其故非好學深思

者，未可與共商此事也。

采石磯臨江有三元洞，在山平石壁中，下瞰大江，土人施木架闕于洞穴中，供大慈尊像，顏曰妙遠，有巨鼠數千，穴石壁中，游人來，僧擊壁呼鼠，道人鼠應聲出，不畏客，以飯飼之而去，蓋人無害鼠之心，故鼠亦不懼也。唐人詩曰：童子亦知善，衆生無懼心。悠々可思。昔錢龍女嘗為予言之，而吳游亦曾阻風過其地，予入楚時，嘗至其洞，見牕几蕭然，萬里江流橫過窗下，佛前燈火熒々，老僧正在定中，令人肅然畏仰，其地雖幽邃而往來通客，以阻風故，多來訪之，非真阿練若也。予問鼠道人安否，僧曰：前年有客放爆竹驚之，今不至久矣，可嘆也。

高孔霖有穎土風物記一書，約五六十葉，記穎上風土人物甚

詳其與地攻之二十一史及方輿紀要皆有原委

孔霖所作五言古詩偏真唐人歎此調今人不薄久矣李于鱗曰唐無五言古而有其五言古斯言一出而世皆趨漢魏遂不復見唐五言古矣哀哉

王望文扇頭有崔免林詩先生的筆也學道人同霹靂居電光轉處一身餘戰爭文字秋墳骨見為神仙榻素書一簾閣稽印樣子殊置風振厲片時無因綠隨受罡風轉大笑攜燈照暗衢

二嚴冷人難浪尋名浮雲久謝大虛爭但尋寂寞山川裏定有

漁樵掉臂行三大事難明心正良能明此事慎旃哉人生共許

生悲仰何用闍羅對面來四蓮花火裏門新放白日看天不用忙自有阿師家具在碎插磁枕飽黃粱五雲內雄雞叫五更孤

懷如月向誰明、秦家鸞鏡無年月、蕭歌而今子昔笙

望文又誦兔牀題、燕子磯一絕云、大江風浪鼓溟濤、石上苔花
繡幾層、燕子不來今又去、卽堪西望是金陵、久不見先生詩、舉
目所見皆青嶂、傾耳而聽皆鬼嘯也、見此如睹青天而聞霹靂、
星維言有婦人患小腹中痛、氣衝上不尋臥、百藥不效、已骨立
矣、有吳人診之曰、此乃經時不調所致、用白芍二兩、香薷一兩、
豬外腎一對、煎湯、消石白礬各五分、共爲末、以豆腐衣包之、煎
湯送下、下黑血甚多、一劑而瘳、亦異方也、

龔首鵬夫人病頭風已數年矣、每發時痛欲死、骨節間格格有
聲、已壞一目、而痛不止、今發愈甚、延予入內診之、予曰是不難、
一劑可瘳也、出定一方、用酥炙龜板二錢、麻黃一錢、桑本一錢、

甘州五分後更為定一方用何首烏、苡仁、牛膝、今服二劑而瘡望文誦閣、古古贈陳伯史詩、海上生還九死餘、老親未葬故鄉、踴絕無世上彈冠想、徒有年來却聘書、伏臘不闕新梅朔、湖山猶伴舊樊澳、侍郎若問回園事、先帝卽陵亦已虛、

子儒言明末高郵有袁體庵者、神醫也、有舉子舉於鄉、袁極發狂笑不止、求體庵診之、驚曰、疾不可為矣、不以旬數矣、子宜亟歸、遲恐不及也、若道過鎮江、必更求何氏診之、遂以一書寄何、其人至鎮江、而疾已愈、以書致何、何以書示其人、曰、某公喜極而狂、喜則心竅開張、而不可復合、非藥石之所能治也、故動以危苦之心、懼之以死、令其憂愁抑鬱、則心竅閉、至鎮江當已愈矣、其人見之、北面再拜而去、吁、亦神矣、

予寓維揚時聽望文談崔默庵醫學默庵太平縣人余寓白雲觀時聞歸一庵數道其人述其醫多神驗而望文嘗從之學醫有省疫流行與傷寒不同方論一書實前人所未發有一少年新娶未幾出疹徧身皆腫頭面如斗諸醫拱手延默庵診之默庵凡診一症苟不得其情必相對數日沈思數問反覆診視必得其因而後已診此少年時六歲平和惟少虛耳驟不得其故沈思久之肩輿遠道時已飢餓即在病者榻前設饌對食見病者以手擎目看其飲啖蓋目眶盡腫不可開合也問曰女思食否曰甚思索醫者皆戒予勿食何也崔曰此症何礙于食遂命之食而飲啖甚健愈不解久之視其室中牀榻桌椅舉室皆新漆氣薰人忽大悟曰予得之矣亟命剋遷一室以螬蟬數斤生

擣徧敷體上。不一二日腫消疹見。則極順之症也。蓋其人為衆所咬。他醫皆不識云。

崔默庵論疹症曰。今人治疹。率用升麻葛根湯。使其毒氣盡升頭面。後多難治。戒升麻勿用。多用葛根。及橫解之劑。少加桂枝。令其毒氣散于四肢。即險逆之症。亦可為矣。其治血熱之疹。用蘇木三四兩。濃煎一碗。頻服用之。無不應手瘡。一婦人患眼症。用大黃四兩。酒煎少許。服之立愈。此等方法。皆能益人神智。故脩記之。

張叔臣。武陵人。諱錫信。其尊人弘載先生。諱嗣堉。初任無為州同知。甲寅隨征。授福清縣丞。與戴文開為中表兄弟。文開入攻之學。卒得之弘載。叔臣令祖少室先生。與孫大東同事。少室先

生
熹字惟照少室其別号也仁和縣籍由材望天啟六年四月授

守備陞廣東游擊奉命取西洋大砲製造施放崇禎辛未計功
陞叅將又陞江東副總兵又大凌河總挂印總兵左府都督同
知賜蟒玉又調山東壬申七月二十三日登州失陷殉難

子龐扇頭有黃自先詩五首甚佳歸之于此薊北重陽雪已飛
何人蕭颯不思歸風號萬里寒吹角月霽千門亂搗衣秣酒乘
糕香野店蟹螯銀菜薦魚磯送君引我家園夢惆悵西山黯淡
暉一憐君廿載歷風塵落落何求獨此身元亮歸來亟傲世染
鴻燕處不因人事辨自信應能變龍性難云尚未馴別去試觀
東海上狂波不動日華新二日暮雅羣集禁園天南孤雁獨高
竊歸從孰路經淮海遊侍來春過太原韓信祠荒秋短艸武侯

廟拱塞長垣，臨岐駐馬登臺望。動地西風別緒繁，三手操神著
自轉環，目縣冰鏡照人顏。頻聞鼓角心猶壯，每卜勛名髻欲斑。
定遠玉關飛食肉，伏波銅柱老征蠻。古人器業拋章句，別後雕
蟲取次刪。四與君對月兩回圓，此別重逢未定年。江左名家尋
顧陸，謂知鐵面天涯老将滯幽燕。千杯綠酒醺僧舍，一路黃花
送客船。途遇洪遵如許我，依然長劍倚青天。五後書殊九月望，

客葵門永孟僧舍，送子龐先生還南魚懷洪去燕。

夷陵頗苦司土之橫，而朝廷則最左袒土官。蓋由吳三桂在滇
時，以土司為魚肉。上主先入之言故也。有永美宣慰司田順
年者，驕悍異常，朝廷嘗詔入陛見，加以宣保，今亦少戢矣。
符五舟中攜寒沱石硯三方，石出夷陵，中有花紋如筍，石淡黃

色而筍潔白如玉若橫截之紋極圓無少偏歌儼如世之圖太極者但石質堅硬不受墨非硯材也

符五言荆西有蝦蟆洞水坑石黑色貴州飯甑山有金星石皆硯材之良者金星石予家有之未知出飯甑山否若蝦蟆洞則从未之聞也

○符五云有查如龍者下江人弘光朝曾為部郎後流落江湖末嘗一日忘天下也康熙初年偽造天下督撫提鎮書札官封印信花押圖書一一逼真書中之意皆聯絡聲氣共圖舉事恢復中原皆有報書州豪為一冊辭皆俊偉攜之走滇南嵩山中僧舍去省不遠為血書一通上平西言天下督撫提鎮及朝中大臣皆有同心倚王為盟津之會王華人也當年之事出于不得

已今天下之機杼在王王若出矣以臨中原天下響應此千古
一時也令一童子于王府上之其意欲露此書于人胥王以
不得不從之勢童子至王府不得其門而入逡巡歸後以假銀
事敗露于曲靖府曲靖知府李率祖号素園向與平西有隙得
此甚喜焚見其書豪幸運天下無一遺者遂取而焚之惟以上
平西血書中督撫聞之于朝命千總董三綱解之入京如龍臨
發時呼三桂曰桂我死尔九族之滅亦不遠矣至京凌遲處死
朝廷之疑滇自此愈深矣

劉玄初蜀入為蜀王劉文秀幕客蜀平平西王復羅置幕中癸
丑閩粵二王皆上疏請解職東歸吳世子應熊使人啟平西曰
朝廷久疑王今二王皆有辭職疏而王獨無朝廷之疑愈深連

拜疏發使來猶可及也。平初命玄初具橐。玄初曰：「上久思調王持難啟口。」王疏朝上而夕調矣。彼二王辭者，自辭王永鎮雲南，胡為効之耶？不可。平西怒曰：「予疏即上。」上必不敢調。予昇疏所以釋其疑也。怒劉出為鹽井提舉。未幾有貴州之變。三桂思玄初言，以之留守學士。至夷陵，駐兵松滋。三月不進。玄初上啟曰：「愚計此時當直搗黃龍而痛飲矣。乃阻兵不進，河上逍遙，坐失機宜，以待四方之兵集。愚不知其為何說也。意者王特送諸大臣入朝，為王請乎？諸大臣尋國之臣，救死不暇，烏能為王王請也？若曰：『待世子歸乎？』愚以為朝廷盜失四海，決不令世子返國也。夫弱者與强者鬥，弱者利于束脩，而强者利于角力。富者與貧者訟，貧者樂于速結，而富者樂于持久。今雲南一隅之

地不足當東南一郡而吳越之財貨山陝之武勇皆雲翔螭集于荆襄江漢之間乃案兵不舉思與久持是何異弱者与强者角力而貧者与富者競財也噫惟望天早生聖人以靖中華耳平而不報未幾至初亦死

符五曰予少年曾夢一比邱尼携之礼懺起見一菩薩如觀音大士而緇其衣符五問其名尼曰然慧菩薩也菩薩厲聲曰然慧汝身是也遂恍笑而覺未幾有愚山知止和上建大悲懺為符五取法名明心号曰默慧造符夢境亦大異矣又五六年夢中甚覺心痒取刀刮之中有大鼠隊地散走遂縫合如故此即彼法中所謂六識六賊也余平生不信釋氏之學而夢中所見如此殆不可解矣夢雖如是而予之不信如故也予意符五

聰明絕世而夢境又神異如此必再來人無疑水到渠成瓜熟蒂落必有其時矣

符五有友劉子喬少年有才氣英穎過人曾夢至一處見禪牀几杖蕭然而闌無一人牀前書一聯云彌桃餘味今安在黃袖遺香孰可留淒然而覺劉氣癖美男子自疑前生必是破戒沙門然而不能改也

螭蜥磯在江中不見形而水石相激之聲轟轟如雷去里許聲猶在耳名曰螭蜥必一小石而猶若是望塘三峽如家如馬又不知當何如也

荻港居人不下數千家百物皆具市井輯接屋宇宏麗有石橋精緻如大內之製游擊開府于港內門境蕭然太平景象可樂

也。

符五云、雲南有土司三家最強、一曰龍鵬、一曰黎世屏、一曰黎思進、皆有衆十萬、火器兵仗堅利絕倫、而黎世屏尤為強悍、此南土之隱憂也。

武昌貢逢聖門前、有石坊曰、天恩重問、後石折中斷、宗人有戲為聯者云、承不起、天恩當不起、重問斷、承不起、有理、上不能致君、下不能澤民、然、承乎無言。

○雲南永祿朝、丁酉科舉人江或、才望士也、洪經略入滇、或將隨公車北上、會試、謁見經略、經略不許、云、崇禎朝舉人許會試、永祿朝舉人不許會試、或曰、若以大清龍飛之日計之、則自天命元年始、得萬祿泰昌、天啟、崇禎、四朝舉人、皆將不許、若曰崇禎

固中國之主也。永祿先帝聖子神孫，西南半壁，固大明之江山也。奈何所取之士，有異于崇禎之朝乎？吾知之矣。崇禎先帝曾為公設御祭九壇，固公之鬼人，其所取士，得為舉人，許其會試，所以報也。永祿先帝，公之仇也，所取之士，亦仇也。其不許會試，宜也。公怒，命扶出。

○辛未八月朔日，舟泊大通，大風雨，不能開船。聽符五談沙定洲妻萬彩雲事。萬，江西人，初生時有彩雲覆其屋上，其父見之曰：「若男子，必非常人。」惜其女也，長隨父入滇南，家于臨安。美而豔，土官晉明聲見而悅之，娶以為小妻。与其室異地而處，生子曰小普。彩雲有機智，未幾晉氏之權盡歸掌握。明聲死，小普嗣剛，很淫亂，而彩雲亦多淫行，常蓄美男子數十人，以決入侍。小不

當意輒殺之有沙氏子土司之後也彩雲悅其魁吾魁之專房
一日彩雲早起他出沙子尚臥帳中小普潛入室內刺殺之彩
雲哭之如喪伉儷後又得定洲龍過前沙定洲生于貧賤然有
權略知書時小普已死普氏之業遂歸定洲後東亂逐沐天波
而陷滇者彩雲助之也彩雲亦人妖矣

王輔臣本姓李氏河南人少為宦官家奴後聞其姊夫在流賊
中往依之驍勇善戰而擄蒲一擲饒有劉毅之風嘗一夜輸銀
六百兩其姊夫知而謀殺之彎弓于門內以待輔臣歸一發不
中反殺其姊夫而逃後流入姜瓖營為料某帳下健兒有王進
朝者無子与料善問料曰汝帳下人有可為我義兒者否料曰
此有二人其一知書一不知書惟公擇不知書者則輔臣也王

擇不知書者自此為王氏子矣。輔臣長七尺餘，面白背，無多須，冉眉如臥蠶，如世所圖呂溫侯像。勇冠三軍，所向不可當。号曰馬鷄子。清兵之圍大同也，輔臣乘黃驃馬時出剽掠，來則禽人，以去，莫有撓其鋒者。清兵遠望黃驃馬騁而來，輒驚曰：「馬鷄子至。」即披靡走。輔臣与白成功、葛秉貞三人更迭乘黃驃馬出，清兵亦不辨乘馬者之為誰也。見即走耳。城克，姜瓖降，八王子以輔臣為蛾，隨入都。口中滿漢，無不以一識馬鷄子為榮矣。八王得羣死，輔臣没入身者庫久之。章皇帝親政，嘗拊髀謂教拜曰：「聞有馬鷄子者，勇士。今不知何在，安得其人而用之？拜亦不知也。」一日拜之僕騎而過市，遇一少年下馬而避道左。僕恠而問之曰：「我馬鷄子也。」向者于某所識公，公忘之邪？僕喜曰：「我主

甚念爾爾來朝不可不早來謁歸以啟教教亦喜俟其來即達之以見上上大喜立授御前侍衛一等蝦蟆朱幾洪承疇經略河南上命侍衛二人隨侍一為張大元一則王輔臣也大元教慢無禮經畧待之少不歡意輒忤上見于晝色嘗曰我奉朝廷命來隨女豈女家奴勞苦如是不當題我為一鎮總兵和經畧亦效開之輔臣事經畧惟謹經畧未食不敢食朱衣不敢衣視經畧所向經畧行輒左右之遇險阻必下騎自執其轡有岡巒泥濘不可行者必背負經畧而過雖家人不是過也勤敏謙恭未嘗以御前人自居經畧絕憐愍之曰兒族有好缺我題女官輔臣輒泣曰臣奉命隨相公死隨相公耳相公勤勞王事臣安忍離相公左右而安居好爵和經畧對之亦泣下經畧以夷

陵為川洶要地，土司雜處，題請設鎮，而大元為請，雖酬其願，亦即為輔臣地矣。大元之鎮經略，攜輔臣上雲南、雲南平，設援勦五營，而題輔臣為右營總兵，轄雲南迤東地方，駐曲靖府。後經略歸朝，遂隸平西王藩下。輔臣之事平西，無異經略，而平西之待輔臣，有加于子姪。念王輔臣不去口，有美食美衣器用之絕佳者，他人不得，必賜輔臣。輔臣為人恭以事上，信以處友，寬以待人，而嚴以御下。然有功必賞，雖嚴士亦樂為之用。嘗奉平西命征烏撒，與諸將會食于馬一棍營中。吳應期亦在坐，應期者平西之姪也。為固山額真，飲酒薄醉，將飯矣，輔臣飯盃有死蠅焉。王搖兵者見之，呼曰：「設有蠅飯，有蠅時馬一棍為主人。」御下酷厲，每以微責人。一棍立斃，故有斯號。輔臣恐其以死蠅故之。

而殺庖人曰我等身親天石人也得食足矣安暇擇哉倭奴之
際死蠅我亦嘗食之矣王總兵性愚蠢不解輔臣意乃曰公能
食此蠅吾与公賭輸吾生下馬輔臣念言既出諸口遂勉彊吞
之吳應期在旁曰奈何王兄馬直如是好騎邪人与兄賭食死
蠅兄便食之若与兄賭食冀兄亦將食冀邪輔臣怒罵曰吳應
期汝恃王之猶子當衆辱我人懼女王子王孫吾不懼也吾將
食王子王孫之腦髓而嚼其心肝挖其眼睛矣遂揮拳擊食案
案之四足皆折案上十二磁盞暨菜碟飯盃酒盃等一一應手
碎左右侍徒以百數皆辟易應期乘間逸去諸人亦勸輔臣歸
來朝酒醒氣平亦自悔之左右勸輔臣謝應期曰固山之言以
本出無心公怒罵過甚往謝而解可耳王甫出門而吳已飛騎

來矣、執手入拜、伏不起曰、昨以酒故、無狀出語傷兄、兄鼻吾誠是、願兄恕之、無藏怒、王亦拜掖之起曰、我醉出語傷兄、兄不罪我、何反自責為、遂招諸鎮來、開筵痛飲、極歡而別、从此相好如初、無間言矣、或有以此言聞之平西者、言多滋惡、平西不善也、造曲靖差將宸入省、領餉銀、事畢辭平西歸、平西勞之曰、女歸言吾問爾帥、衆各營將士無恙、更語爾主前、征烏撒時、與吳應期、爾後爭攘、少年兄弟、使酒罵坐、此其常事、乃至老拳相向、亦復何妨、誰是婦人、腹有私孕、懼其打落耶、打即打耳、何必牽引老夫、乃云女是王子、吾將食王之腦髓、心肝、此誠何語、令他人聞之、拈口笑我曰、吳三桂老子、平日愛惜王輔臣如珍寶、今一旦思食其腦髓、豈不令人寒心、歸語尔帥、今後更無作此等語、

王輔臣聞之亦怏怏曰我今女皆朝廷臣豈女家人而受制于女女自向女之姪視我為外人天下無不散之筵席安能鬱之久死此邪乃密遣人持金錢入都徧賂朝廷左右暨用事者人交口王輔臣上聞之亦耳熱矣適平涼提督缺出上以邊鎮須材特點輔臣報至滇南平西聞之如失左右手嘆曰小子貴亦不貴矣家私幾何乃如此胡為邪及至省辭王王待之愈厚執手涕泣曰爾至平涼無忘老夫女家貧人口眾萬里迢迢何以當此遂出帑二萬兩以為路費輔臣至都久不得陛見蓋其平日專用力于近侍之人閣部九卿全不留意故滿漢大臣多少之無人引見兵部曰事關儀制在禮部禮部復曰提鎮引見兵部事也兩相推委而王輔臣又不肯受以金璧賄賂部

臣惟隨衆常朝而已一日朝上賜羣臣茶有近侍曾識王者
行茶至前私問無恙曰來幾時矣曰久矣奴不得數語後上
燕居偶念平涼提督何久不至近侍奏曰至矣前常朝賜茶時
奴親見其坐班上曰何不引見至令人出外訪問立詔之入
上坐內廷以待望見喜曰有武臣如此朕復何憂自此恩澤頻
加賞賚屢及無日不召入語必移時近臣駭然不知其何自也
都下哄傳以爲平西有密語令王入奏又訛爲鷄子爲馬兒頭
種不經之語令人發笑上問輔臣出身曰身者庫上驚
曰如此人物乃隸身者庫邪立命出之改隸旗下因謂之曰朕
欲留女子朝朝夕接見但平涼邊庭重地非女不可其命牧天
監擇好日以行時值歲暮而是期歲內上又謂之曰行期近

矣。朕不能捨上元在通其陪朕看錢通而後行。更命欽天監再擇吉日于上元之後。屆期入辭。溫語良久。授以方畧。重加賞賜。

御座前有蟠龍豹尾鏡一對。上指謂輔臣曰。此鏡先帝

所遺。以付朕者。朕每出。必列此槍于馬前。以無忘先帝。汝

先帝之臣。朕先帝之子。它物不足珍。其分此一槍。以賜女。女

持此往鎮平涼。見此一槍。如見朕。朕見此槍。如見女矣。輔臣拜

伏于地。泣不能起。曰。聖恩深重。臣即肝剖塗地。不能稍報萬一。

敢不竭股肱之力。以效涓埃。涕泣而出。癸丑。平西王反。念陝西

為天下之脊。而王輔臣張勇。實握兵柄。又皆舊部曲。輔臣尤為

親密。雲南援勦右營標下。聽用官汪士榮。向為輔臣之行親信。

三桂訪得之。以書二通劄二道付士榮。令其從間道走平涼。以

致輔臣而令輔臣以書一劄一轉致張勇不別遣使輔臣得書立使人拘執士榮令其義子王吉貞賣逆書二通偽劄二道解送使汪士榮星夜入朝上見之大喜置士榮于極刑留吉貞于朝晉職為卿而嘉輔臣之忠貞也張勇聞之怒曰吾二人事同一體女即欲作忠臣亦宜先使知會同遣使入乃背我獨獻忠于朝廷令朝廷疑我是賣我也我看女作忠臣者作至幾時自此張王遂成參商矣秦州之變世多知之茲不具記然初非輔臣本意方其下之謀為變也輔臣以死自誓曰益殺我無負朝廷言之至再逆變局已成而輔臣亦無如之何矣平涼之兵既殺經略陝西督巡以反狀上聞上亟召王吉貞入內曰女父反矣吉貞曰不知也上即以陝撫之狀示之吉貞戰慄喋

不能言。上曰：無恐。朕知女父忠貞，決不及此。由經略不善調御，平涼兵變，脅女父不昇，不從耳。女宜亟往宣朕命，女父無辜殺經略，罪在衆人。女父宜竭力約束衆破賊立功。朕赦衆罪，不食言也。吉貞星夜歸平涼，時輔臣尚在秦州。平涼居守諸將技癢正不可柰，忽見吉貞歸，歡呼曰：大統命至矣。擁之入城，奉為總統。兵設官分守焉。吉貞亦將。上命置腦後，自吉貞歸平涼，而王氏之反勢成。輔臣既殺經略，詎不思疾取西安，而張氏雄踞西陲，耽耽虎視。一舉足而東，則張氏卷甲尾其後，躊躇首鼠，退保平涼，而大兵已四集矣。輔臣初在大同城破之日，有結髮妻自縊而死。後貴復置妻妾七人。平涼被圍時，輔臣顧七人而歎曰：死大同者，今無其人矣。七人聞之，同時皆自縊。死。輔臣出戰，雖

屢勝而孤城坐困不支。經略圖海招之降。与之鑽刀設誓。保其無它。輔臣出降。隨經略轉戰有功。事多不具錄。事平。上撤經略還朝。即召輔臣入京。鞍馬已具。行有日矣。乃出其後妻。自七人。繼後。輔臣復娶一女。至此忽与之反目。怒不可解。登時欲出之。台其父來。与之決絕。而密詔之曰。願汝女永離此。他方遠嫁。我出汝女。所以保全之也。有工匠隨征久。具呈于輔臣。求批歸省。輔臣取其呈。手裂之曰。汝歸即歸耳。尚須此物邪。汝歸不宜復來。逢人不可道一王字。命取展費之工匠。涕泣辭去。隨命司計者。取庫中銀。多少分之。各為一封。多以百計。少或數兩。一一標識。餘一二萬金。置之庫中。以印條封之。更錄簿一冊。記銀數。并諸雜物曰。吾為提督久。豈無餘貲。令人動疑。累女後人也。取

舊帳目悉火之。召諸將卒親隨人等至前曰：女等隨我久，東西南北奔走，犯霜露，冒矢石，亦良苦。今我与女等辭，女等宜遠去。隨其人之功績，各以銀一封与之曰：女持此願歸田者，亟歸。願入行伍者，速投它鎮去。無言向在我處，衆皆哭。揮之行曰：速去。我事自當無累女等。此決矣。既發，遣衆乃命酒獨酌，高歌，飲訖，見盛魚銀碗在案，重二十餘兩。沈吟曰：此物當与誰？適有童子捧茶至，顧曰：女在此幾年？曾娶妻否？童子曰：未娶也。遂命取石槌碗令碎，以授童子曰：与女歸娶一妻，勿更來矣。復酣飲，高歌二三日，問門下尚有幾人，則惟數十人在矣。亡之來，共坐呼酒歡飲。至夜半，泣謂衆曰：我起身行伍，受朝廷大恩，富貴已極。前迫于衆人，為不義事，又不成功。今雖反正，然朝廷蓄怒已深，豈

有饒我大丈夫與其駢首僇于市曹何如自死然刀死繩死藥
死皆有痕迹則將遺累經略遺累督撫遺累女等我籌之熟矣
待我極醉繫我手足以紙蒙我面冷水喫之立死身病死無異
女等以疾厥暴死為言眾笑諫之怒欲自刎眾從其言天明以
厥死聞後經略入朝上問王輔臣經略言反詐其本意上
怒曰女与王輔臣一路人也圖海懼吞金而死惟張勇坐鎮河
西始終不變三秦賴其保障上嘉其忠封靖逆侯世襲人謂
靖逆之功實王輔臣激成之云

江西風土与江南迥異江南山水對木雖美麗而有富貴閑闊
气与吾輩性情不相浹洽江西則皆森秀竦挿有超爽遠舉之
致吾謂目中所見山水當以此為第一它日縱不能卜居亦當

流寓一二載以洗滌塵穢開拓其心胃死無恨矣

岷江萬里奔流至江南已就坦途迤迤東去若安慶以上其浩
蕩之氣猶未盡綢又受彭蠡之流阻以小姑之險瀕洞震動不
可方物江南兩岸固不乏山亦皆寬衍平舒此則層巒疊嶂與
江孰爭雄峭森秀如荆關之畫而情為之移

湖口縣下石鍾山石無巨細皆挿空壁立如吳郡范墳萬笏朝
天之狀石壁數百仞下臨無地秀極絕勝震澤之石公有漁人
為棧道于壁間者望之如飛仙予與虞臣叫絕齊五云先生若
入蜀寸寸皆是物也久之亦厭極矣何奇之有予思自幼孰讀
少陵詩若不入蜀便成唐喪倘遂茲願則一州一石皆別有妙
悟軒新更讀一部活杜詩其境界當何如也唱綬堂于病中無

端忽思成都有詩云卜肆垂帘新雨霽酒鐘眠客亂花飛
得到成都去肯為妻兒一灑衣想先生亦是杜詩在八識田中
作怪故現此境不然先生从未到成都何以無端忽有此想邪
鄴道元所謂石鍾山東坡泊舟於此作記者乃上石鍾山也

下石鍾山有閣曰江聲在山半踞石壁上南望彭蠡西對大江
游觀之地于斯為最乃其地為公所荒蕪不治北牖下有槽檻
馬矢堆積令人嘆絕此与才士流落不偶者何異若此閣在吳
下所遇不知當何如也

同舟有劉公者庚午曾隨征阿魯得辛未春隨駕其言与

予向之所聞無異朝廷以厭戲愚北信有之矣

湖口縣南望彭蠡不見涯際鞋山峙湖中浮圖如筆插天大孤

山尚縹渺雲外也。

上下二石鍾山，為湖口名勝。萬曆嘗宦官李道奉設關榷稅于此。于上鍾山大治臺榭，顏曰學圃。後李去，關撤，其地亦廢。今無片瓦存矣。山塢中艸溪數尺，堯峰僧坦然自京師歸，訪友于此，不值，有窮途之哭。囊中惟錢十八文耳。日坐江邊賣藥，以度朝夕。環視石鍾，惻焉心動，尋蘇舊跡，渺無存者，不有梵刹，為山靈羞。即穀災以募建為己任，乃坐于關使者之門，晝夜不卧。凡二十五日，使者心動，施銀十兩。公即募人薙州除礫，築地為基，而架木于其上，覆之以席，禪誦于內。值使者解任歸，泊舟山下，見而異之，曰：吾以女得銀，它佳矣，乃果為此難成之事耶？復施銀二十兩。書吏人役等各以其力，衆擎而舉此。庚午夏，煇間事也。

為菴一顏曰潮音中奉大悲尊像西向像前燈火焚上菴之後半廈為公禪栖處面絕壁而開東牖旁一小廈為香積屋止此耳菴前尚無牆垣旁有隙地而無鄰屋恐其易傾以木支之山風時來吹落簷瓦公之願蓋未竟也

符五云打仗之際刀惟一掠耳不可直斫斫必傷刀為它人制矣馬上槍法決無向前直刺之理惟有回身一槍耳打仗不可不多備鷄子鞋鞋須穿過二三日者方妙新恐勻是不相得也必葡萄乾飯一包子肉脯置腰間飢時食之精神十倍更帶米一二升若飯盡可于地掘一小坑築土令緊水濕之鋪對葉一層置米上米淘過更以水濕之米上覆之以樹葉葉上鋪土以火煨之即成飯矣此法大妙沐獨行役人當知也帶白蠟米一包

硃砂少許遇暑熱發急難撲跌損傷時食之可以護心不死若
兵散不可晚入人家語皆徒經歷中得來故親切而有味也
蘄州道士泐在江之西南山極奇峭有蘭若臨江對木叢茂大
石數十丈踞江邊舟過其下仰望之復自看身在舟中舟在江
中恍如畫裏佳絕

武昌縣在江之西南岬即古武昌鎮也陶侃庾亮所鎮皆此地
東坡游赤壁時所望亦此今也武昌則江夏也

辛未炁予寓漢上時臥處共有四官象乃天地水火也三官始
于黃巾而道士家目之不知何時益之以火漢口皆是也天地
水火為四正益以風雷山澤為八卦之神亦是一說
冰鑑和上為費隱和上之孫而獨剋敬和上之法嗣也冰鑑喜

參天童密老人天童曰荊州有天王道場女能重興之不勝如
親近老僧邪天王即道悟之道場廢久矣惟得一骸魄耳基皆
為人所侵占和上遂于此發願尋訪久之而後得其道基竭力
恢復今已輪焉奘焉儼然一祖庭矣愚案天王皇晉既相同以
其人又皆名道悟皆在荊州亦一奇也由此濟洞二宗各以其
所見互相是非浴血而戰兵連禍結至今猶未已也夫豈所謂
門諱堅固者非邪洞庭橘香同岑和上洞下尊宿也嘗謂予言
天皇實非其人自古未有以天皇名寺者濟宗所据之鐵案以
五燈會元印玄素之碑為証夫印為荊州節鎮考之唐書實無
其人夫節度豈無關者而史遺之邪濟洞二宗之子孫各祖其
祖門戶既立則兩造之言俱不可信竊予少暇為彼攻之自有

定案矣

漢陽渡船最小俗名雙飛燕一人而盪兩槳左右相交力均勢等最捷而穩且其值甚寒一人不過小錢二文值銀不及一釐即獨買一舟亦不過數文故諺云行徧天下路惟有武昌好過渡信哉

龜山即禹貢之大別形肖龜故俗名之

黃鶴樓建漢陽門城樓上魏七百尺西向大江樓前有白石浮圖工麗無比如西番阿育王塔式四周皆鐫大梵書恨不能詳其誌南向建石坊題曰勝像寶塔大元至正中威勝王太子建樓南之臺曰湧月有粗黃石大書湧月臺三字高古遒媚俗以爲曹孟德所書夫曹公未嘗至此其說附會可笑

黃鶴樓中層上皆奉純陽象黃鶴仙踪乃費文禕事與呂洞賓全無干涉呂咸通中入而崔考功之詩作于天寶有何難致而昧上至此哉蓋文禕無人知之洞賓則名喧天壤故也人不可無名神仙猶尚如此又何怪今之人趨走如鶩和予嘗謂佛菩薩中之觀音神仙中之純陽鬼神中之關壯繆皆神聖中之最有時運者莫知其所以然而然矣舉天下之人下逮婦人孺子莫不歸心向往而香火為之上盡其故甚隱而難見未可與不解者道也

潘太叩弟葵叩紹興上虞縣人流寓都門三世矣尊公明季乙卯北闈舉人任太原府同知國初補江西崇義縣太叩思季來武昌入藉府學順治初拔貢出為雲南黑鹽井提舉陞雲南鶴

慶府劍川縣知縣。上在西南極邊。與麗江府界鄰。麗江知府乃土官。有瀾滄江。渡江而西。則西番焉。斯載大寶法王地界矣。先生任滇久。見吳三桂所為多不法。知必為亂。遂歸武昌。未三年而變作。夏逢龍之變。人爭出城入山逃避。先生獨閉門飲酒。高歌曰。無能為也。即平矣。先生之識。加人一等矣。

漢口不特為楚省咽喉。而雲貴四川湖南廣西陝西河南江西之貨。皆于此焉轉輸。雖欲不雄天下。不可得也。天下有四聚。北則京師。南則佛山。東則蘇州。西則漢口。然東海之濱。蘇州而外。更有蕪湖。揚州。江寧。杭州。以分其勢。西則惟漢口耳。

漢口三元庵後有亭曰快軒。上後高柳數百株。平野空闊。渺然無際。西望漢陽諸山。蒼翠欲滴。江南風景秀麗。然輸此平遠矣。

漢水之西南，距大別之麓，皆湖渚，芰蘆菱芡，瀰漫蒼莽。江口築隄，走龜山之首，約里許，自西達東，石甃平整，循隄而東南，望湖渚，有江南風景。

大江自南迤北，武昌城在北，即古江夏地。城南為鸚鵡洲，漢江夏大守黃祖殺禰衡處。洲近南岬，而江流遠出其東。洲北武昌南流而之大江者，曰鮑魚臺，使无此洲，則江執之浩淼為何如邪？

龜山有孺子期聽琴臺，不知在何許。古跡謬妄，槩不足訪。晉神禹道漢水至于大別，會于江，俗呼大別為龜山，以形似也。隔江有山，蜿蜒東出，俗曰它山，遙々相望。半生以來，登覽之勝，無有踰于此者。蓋山雖不高，而當江漢之匯，四顧空闊，潛沈數重，環

拱于此支交脈會左右盤據目窮于應接矣案尚書禹貢漢水南至大別入江左傳定公四年吳師伐郢楚子常濟漢而陳自小別至于大別京相璠春秋地名曰大別漢東山名也在安豐縣南杜預釋地曰二別江漢之名無緣乃在安豐也桑欽水經沔水自沔陽縣北又南至江夏沙羨縣北南入于江酈道元曰沔陽廢沔水之陽沔水又東經林障故城北晉建興二年太尉陶侃為荊州都督顧此庾仲雍曰漢口一名沔口矣案地說漢水東行觸大別之陂南与江合則与尚書相符但今不知所自矣予嘗謂鄧善長夫人其注水經妙絕今古北方諸水毛髮不失而江淮漢沔之間便多紕繆鄧北人南方之水非其目及也小別不知在何許竢更考之

自鐵門關西上為龜山首，有樓巍然，曰晴川，與黃鶴對峙，蓋取崔灝詩以名樓也。旁有禹稷廟，昆陵人毛會建，刻南岳岵嶺碑于廟前，而紀其事。樓臨江東向，軒豁開爽，遠勝黃崔益龜山之首，走江中數百步，而大江橫過其下，左右無遮蔽，與市廛稍遠，縱目所之，山水之情，與精神融洽，不如黃鶴之散漫無章，可謂後來者居上矣。

予意黃鶴樓即黃鵠磯，後人訛鵠為鶴，而附會以費文禕事，一經崔考功題，而青蓮閣筆已成千秣鐵案。乃今又轉而為呂純陽字經三寫，烏烏成馬，天下事已往者皆成冷風蕩烟，又何是非之可論？只要事理燦然，悅人耳目，吾亦任之矣。又安从起古人于九京而問其果然、果不然，抑無柰展轉荒謬，詞不雅馴，今

人難為聽耳。

鄴道元曰：黃鵠山林潤甚美，譙郡戴仲若野服居之，山下謂之黃鵠岬，下有灣，目之為黃鵠灣。黃鵠山東北對夏口城，魏黃初二年，孫權所築也。依山傍江，開勢明遠，遠境藉阻，高觀枕流，上則游目流川，下則激浪崎嶇，實舟人之所艱也。對岬則入沔津，故城以夏口為名，亦沙羨縣治也。予意秦欽之所謂嘆父山，魯山，與鄴善長所謂翼際山者，皆今之所謂蛇山一帶耳。有鸛鵲洲，口為據矣。黃樓鶴旁湧月臺，有小石碑云：此山即元之高冠山也。高冠二字，未之前聞，意者曰：鄴注有高觀枕流四字，元人于此置觀，後遂因之，名山復訛觀為冠邪？不然，山自太古，何獨隸之元和，當更攷之。

黃鶴樓後有道院甚精麗其額顏曰覺岬內塑純陽睡像亭曰
仙棗卽鄖道上靈生与純陽各分半席而酣寢大覺而後知大
夢祖生之鞭必有先之者矣亭南有小門下距地數百尺施磴
道曲折而下蓋漢陽門建于它山之脊而黃鶴樓復建于城上
据地最高它山逶迤東去茲則南出故陡絕耳門上有官告諭
禁人往來蓋茲地為漢陽提徑若不禁止熱中者羣趨于此商
山佳処卽成通衢矣

它山界武昌城為南北二區巡撫布政皆開府于山北而總督
公署則在山南藩司之前鑿山脈而斷之建鼓樓于其上為南
北通衢用形家言也漢陽大別之鐵門關亦如是矣妖言邪說
殃及山川此天地之靈乃世之号為儒者以窮理格物為宗亦

樂其說而媿上言之何也

洪山寺建于武昌東門外蛇山之麓為明楚王所建道場宏麗為天下第一照牆有碧琉璃交龍壯麗晃耀牆宇高峻如都門西山諸梵剎製南向為山門為執金剛殿為四天王殿為彌勒殿有豐碑一座在鐘樓前紀年景泰開山為碧空鐵禪師餘文不暇詳也至大雄寶殿已山半矣南望數十里湖光滌瀉寺因阜互出沒殿宏麗如大內乾清宮三世天人師三十二相圓滿具足勝妙殊特施如寶山阿難迦葉侍立左右諸大菩薩退坐天人師後諸聲聞眾列坐兩廡二楹述金剛神捧寶杆東西向各長二十八金甲冑威猛如生殿柱皆合抱蟠龍梁棟樑題悉施金碧耀人心目平生所見莊嚴佛土未有若斯之至者吾恐

天台智者大師于大蘇山入法華三昧前方便親見靈山一會
儼然未散亦不過爾矣大雄殿後為彌陀殿中供無量光世尊
而觀音勢至左右之旁列二十四諸天像安養淨土延于驚嶼
穀之東上別為一區有亭二進為上官往來游觀飲譙地其後
浮屠七級則登覽之最勝處也

予在武昌見鹽店招牌書曰重硯白鹽余不知硯為何物思之
久而不得也問之宗夏宗夏曰硯秤錘也音硯鹽每包重八斤
四兩製權而之而衡其較重曰硯如其數者為重硯也

鄴道元博極羣書識周天壤其法水經也予四瀆百川之原委
支流出入分合莫不定其方向記其道里數千年之往跡故瀆
如觀掌紋而數家寶更有餘力鋪寫景物片語隸字妙絕古今

誠宇宙未有之奇書也。時經千載，讀之者少。錯簡脫字，往往有之。然古玉血斑，愈增聲價。但其書詳于北而略于南，世人以此少之，不知水道之宜詳，正在北而不在南也。余在都門，為崑山定河南一統志，彙遇古今之沿革，遷徙，盤錯處，每得善長一語，渙然冰釋。非此無從問津矣。北方為二帝三王之舊都，二千餘年未聞仰給于東南，何則？溝洫通而水利修也。自五胡雲擾，以迄金元，淪于夷狄者，千有餘年，人皆艸土偷生，不暇遠慮，相習成風，不知水利為何事。故西北非無水也，有水而不能利用也，不為民利，乃為民害。旱則赤地千里，潦則漂沒民居，無地可瀦，而無道可行。人圖無如水何，水亦無如人何矣。元虞奎章奮然言之。郭大史毅然修之。未幾亦廢。有明三百年，更無通而問之者。

矣。予謂有聖人出，經理天下，必自西北水利始。水利興而後天下可平，外患可息，而教化可興矣。西北水道莫詳脩于此書。水利之興，此其粉本也。雖時移世易，遷徙無常，而十猶得其六七。不熟此書，則胸無成竹，雖有其志，何从措手？有斯民之志者，不可不熟讀而亟講也。

水經注千年以來，無人能讀。縱有讀之而歎其佳者，亦只賞其詞句，為游記詩賦中用耳。然亦千萬中之一二也。吾友虞山黃子瀉，獨能沈酣此書，參伍錯綜，各得其理。好學深思，心知其事。吾子子鴻見之矣。千世之後，復有子雲善長抑何幸矣。更得宋人善本，正其錯簡脫訛，支分綫析，各作一圖。其用心亦云勤矣。惜其專于攷訂，而不切實用，尺有所短，無可如何。予東歸後思

以此本照宋板割裂改正裝裱成書命門人抄錄其圖併二十
一史輿地志考而顧景范有讀史方輿紀要傳是樓有一統志
彙皆輯錄之以為經水經注之資云

古書有注復有疏上以補注之不逮而通其壅滯也鄧道元水
經注無有疏之者蓋亦難言之矣予不自揣效思負山欲取鄧
注從而經之魏以後之沿革事蹟一一補之有關於水利農田
攻守者必考訂其所以而論之以二十一史為主而增以諸家
之說以至於今日後有人興西北水利者使有所取正焉予既
得景范子鴻以為友而天下之山經地志又皆鑒于東海此書
不成是予之罪也當予宗夏勉之

歷代史冊浩繁極矣苟不提挈其綱頗便如一屋散錢無从着

手如春秋通鑑目錄大事記皆苦其太略而朱子之綱目又多
書迂闊不切之事關係重大者反多遺漏前人之書縱極盡善
不經我手如觀它家寶與予無益也予最愛竹書紀年有絕人
之識春秋外別為一家父思取竹書以後迄于有明歷例勒
成一書以脩遺志年來奔走四方無一日之閒更有十倍于此
者亦皆置之高閣況此考訂編輯之末手兩日兀坐僧房看倪
黃二子閑通鑑大全此等書不知出于何儒之手乃託文章巨
公之名以誑世之聾瞶人家子弟輒奉以為聖經賢傳不敢別
置一喙聞人出一議輒搖手閉目以為侮聖人之言嗟乎學者
識古今之成敗是非以開拓其心胸為他日經濟天下之具也
乃以此等糞穢丸礫填塞心胸牢不可破求其磊落軒天地者

又胡可得邪、哀哉、可為痛哭流涕、長大息者也、然取之以考年
月、紀姓名、亦胡不可、乃其中謬譌、亦復不少、予令宗夏置簡二
冊、上橫書甲子、每簡二十二行、後一冊、每簡十行、自堯甲辰始
每年紀其年、并大事、上一冊紀唐虞三代其事、簡後一冊則
入通鑑事、煩矣、故止十行、寓中無它書、惟據此耳、聊以此為續
竹書紀年之州、豪經營一過、諸事皆有頭緒、他日可以讀史矣、
倪黃二子學史、實自此日始、

通鑑託始于周威烈王戊辰、初命三晉為諸侯、其此皆姝獲麟
尚七十年、所以避續皆姝之嫌也、通鑑以前事、則宋京兆劉恕
有通鑑外紀、起三皇本紀、至周共和、又一蘭溪金仁山履祥有
通鑑前編、起陶唐王威烈、所以補通鑑之未載、令學者知古今

之全也。乃外紀則取諸子書暨識緯之說，以圖畫虛空于洪荒之世。今之小部，率取此二書合為一冊。牛鬼蛇神紛然滿紙，不復可以寓目矣。言不雅馴，薦紳先生難言之。

自堯甲辰至舜南巡狩崩于蒼梧之野，共一百二十六年，是為一而而夏禹即位，則在丁巳。中間相去七年。此七年者，當何所屬？抑果如孟子之言，辟之于陽城邪？抑別有故邪？今亦不記。皇極經世書以此七年歸之于譏，而竹書紀年有異同否邪？

外紀記商王紂三十二年，以長麻通之，是為戊子。而武王即位，則書己卯。若是，則紂之二十三紀也。夫武王即位于己卯，而謂紂亡于戊子，和無書可檢，故提綱仍以己卯推之。

余寓漢上時，漢陽令張壽氏拾散竹箬瓦，孟冬參五筭，庭中黃

菊粲然、二白鶴飲啄于其側、亦度清風蕭然、可樂世風一變至此、天意誠不可測也、歸与宗夏言而歎之、

林障山有故城、晉建興二年、太尉陶侃鎮荊州治此、後移沙羨、此處遂廢、今土人呼曰城頭山、在漢口之西三十里、

鄂家口人烟輻輳、百物皆具、宗夏言此地近日氣象日隆、人物趨此、漢口衰相已現、漢哀此其昌乎、蓋上游縣盛、古說荊襄後則團風鎮明季移于武昌、漢口之興、利在清初、今鄂家口又將繼漢口而起矣、

長湖口渙曹數百里、星羅密布、更是一重境界、予嘗言渡江令人雄毅入湖、令人深靜、驗之于此、益信然矣、

荊州護國寺莊嚴華整殿後有大鼎一座、以石曼承之、古色斑

爛可愛俗云大禹九鼎之一不覺失笑

報國寺乃關壯繆祠極其壯麗江陵舊城乃羽所築祠之宜也而遂以江陵為古荊州相去遠矣

謂宗夏曰余平生以來未曾見擊惟見竹耳六上歲時曾見山水少長不更見矣前在石鍾大別依稀如隔羅縠不謂之見此語索解人不得

煥章云荆州市明末極盛列巷九十九條每行占一巷舟車輻湊煩盛甲宇內即今之京師姑蘇皆不及也今則寥々一帶爾盛衰變遷令人感慨係之

荊州城最窪下江水經其東南以長隄障之故溝洫皆壅斷不能相通決江水則荊州之人可使為魚鼈不可守也

晏瑞師言襄陽穀城縣牧豎穴地得古延慶寺道場有殿三層皆在地中前殿亮榻皆鑿石為之後有延慶祖師塋晏公不記其何代人又不知何故陷于地中滄海桑田高岸深谷信然矣巖頭道場在武昌西南門外過渡處德山鰲山皆在常德

荊州南門外五里許即大江名曰御路口江正東西流江之北限以長隄障江水也江不甚濶而流頗急已有川江之勢樂江陵即古之南郡治其地東南傾故緣以金隄自賈溪始桓溫令陳遵造隄遵善于防攻使人打鼓遠聽之知地勢高下依傍枌築略無差失夫陳遵之測量以耳不以目予嘗見瞽者張浩庵以舌銛銀而知銀色之高低則五夜未始不可以互用不復圓通祇是心粗耳俗傳明初馬后至江陵于此登岸故名其地為

御路口、江洲載蘆荻萃于此泊、樁入江陵焉。

澤口別漢入潛之地也、屬安陸府、与潛江縣治相距不過十餘里、宗夏云、若向西北沂漢而上、則向鄖陽襄陽漢中矣、由澤口向西南順流而下、三十里至梅家嘴、若再順流而南下、則出大江達新隄漢口等處、欲至荊州、則自梅家嘴復逆流西上也。四絕名蓋者、天台玉泉栖賢靈巖也、栖賢在潤州、今隸江南境、靈巖在兗州、今山東、玉泉在當陽縣、今湖廣、天台在台州、今浙江、境皆智大師道場、棲賢靈岩尚竢敦訂。

金粟寺、乃吳大帝赤烏年、康居僧會所建、僧會于江南建三刹、一金陵之保寧、一太平之萬壽、一海鹽之金粟也。

荊州大暉觀、兩廡畫壁、圖寫靜樂園、大子降神出家修道上昇。

諸聖蹟大約依倣悉達雪山事而為之不知孰自何人膽大乃
尔然亦天地自然之致也嗚呼今諸山知識往往互訛為魔釋
迦之預託胡不焚乃尔邪然諸公自不識魔字魔字之義壞于
梁蕭衍之不知妄作譚場微意失已久矣

黃二玉言人中藥箭者細嚼黃豆塗之可不死立愈奇方

沙翁偶述雪嶠老人詒風居句云糧空夜雨滋黃獨屋漏春風
補翠藤近代尊宿之能詩者無踰老人恐無可齊已不是過也
章華臺在荊州沙市古城隍廟東約二里許路北有閣曰古章
臺未知何故去一華字自此而北長隄里許堤旁有廢刹曰章
華寺南望蒼然寺之東北有晉井一口磚砌周級曰沁香井土
人言此為楚宮故蹟數丈之下始有水倒影杳然人影在下俯

而上窺自井畔。上而東折路盡有地隆起上建八角石亭。屹然孤立相去不過一箭道而逶迤曲折有路轉崙回之致亭之東北湖水斷續水落之後備有數畝澄蛟深帶其側殘荷敗莖飄零水際予与宗夏頗賞其位置土人以此為古章華臺基又云此亭為前藩司李公所重建欄楯皆精麗古雅夾隄梅枕彌郊野由此而東北二百里中皆蔣夫渠春夏間乾坤繡錯後吳三桂兵駐松滋將大軍遠屯此地蹂躪蹴踏梅柳柰杏無一株存者臺基磚石崩圯墮落此与武林之西湖同一傷感今西湖稍復舊觀此地廢興當亦有其時矣。卽志言章華有二一在沙市一在監利縣離湖之側予攷之舊冊在監利者乃章華臺此則所謂楚王釣臺也。卽道元曰江陵城西南有赤坂岡上下有

瀆水東北流入城名子胥瀆蓋吳師入郢所開也謂之西京湖
又東北出城西南注于龍坡古天井水也北有楚莊王釣臺也
高三丈四尺南北六丈東西九丈今穀之正在沙市又曰揚水
又東入華容縣有靈港水西通赤湖水口地多下湖周五十里
城下陂池皆來會同水東入離湖杜縣東七十五里國語所
謂楚靈王闢為石郭陂漢以象帝舜者也湖側有章臺口高至
十丈基廣十五丈左邱明曰楚築臺于章華之上章昭以為章
華亦地名也王与伍舉登之舉曰臺高不遠望國之祿祿大不
過容宴之俎豆譏其奢而諫其失也言此瀆靈王立臺之日漕
運所由也此則監利之章華臺矣監利古華容地今離湖之迹
猶在也

因讀史謂宗夏曰古之諸侯即今之土司也後之儒者以漢唐宋之眼目看夏商周之人情宜其言之愈多而愈不合也破封建而為郡縣固時勢之不得不然孟子已先言之矣天下烏乎定曰定于一李斯之說必受之于卯卿者也

沙市之西有觀音寺中有浮屠五級甲寅之變大軍与平西之兵隔江而陳浮屠遂為瞭望之所浮屠之東少北有石尊勝幢浙江僧卓然言此地舊有龍潭寺龍居之大為民害自無方禪師建幢于此其患永息今成平陸矣予意此潭即天井水也天井水亦曰龍陂鄢道元曰廣圓二百餘步在雲縣東江隄內水至淵深有龍見于其中故曰龍陂以方隅求之毫釐不失亦可崇也

煥章言蜀中黃連蛇乃近時新出之異藥流行尚未徧于土醫家猶不能盡知此蛇產黃連地中形甚小惟食黃連花土人取而陰乾性身連同而功什百用時以水蒸之水氣成露者黃色作連氣一匙之水勝黃連數錢予習聞之而未經目見昨在都中吳侍御翼生自蜀中携來者予亦未及索看煥章處大有一條襲而藏之者不甚佳以其形稍大耳茲一寓目他日舉以示人不為塗說矣

煥章談江陵形勝往跡亦略知其藥云荆江西上有萬人隄最為險要若掘此隄則荆人皆魚鼈矣昔曾有人以此說進三桂三桂惜此百萬生靈而不用也予為沈吟感歎者久之予以小時多事手未可認筆故艱于拈弄學者若欲筆墨成章

須一二年苦功，眠食于此，他日自能操縱如意，橫視一世矣。若其中之提挈綱領，批條道義，予雖不能而知之，無有復過于予者矣。

近人文字，目中所見者，惟燕峯暨易堂耳。燕峯孤立，未見有与唱和者。易堂文雅，印印士集，予未見。然當推躬菴為第一。華蒼浩瀚，有大气以舉之。南宋以來，未之多見也。

涵齋言大人托賴等奉旨至貴州，審黎平府高岡土司金倒一案，即將黎平府知府張激、城守副將侯奇立刻處斬。更有武升三四員，問絞監候。覆決蓋大人已奉嚴旨而出也。總督范承勳降四級調用，巡撫衛既齊革職。覆旨後，更命部議衛既齊擬斬奉旨着解來京更議。蓋自三藩平後，今上于諸土司加意

撫卹以反平西之所為也

汪杲亦徽人名聞字尹子一字東陽以篆刻游于婁東得錢值手散盡不事家人生產終于王峯其學原本秦漢雜以宋元章法何望漢而後亦近代之傑出者

張未園名程嘉定人黃陶菴先生之門人未園稍豐于財嘗齎三百金衣錦繡泛舟金陵收古書簾滿載而返中流舟漏以襟袖拭之通身淋漓漏猶不止遂仰臥于漏所以背抵之舟得近岸艤之而行前輩風流今猶溢人齒頰也

再生和上初名澄如嘉定人精修苦行常食淡刺血寫經因出血過多昏去百日後復治故易今號崑邑之新涿江東有長者王國良置子財其子病瘵垂斃長者入城完夜稅日尋出城以

子故必欲抵舍至江干為渡船所苦遂露宿江幹平明始得渡
歸而子死久矣長者恨子死不得一見也遂發願于新漾江造
橋以便往來之利涉先出三百金造木橋一座又念不能經久
若石橋則非巨萬不可長者即披薙為僧法号萬圓以募橋工
自任往見石奇和上和上以其老而易之曰若要石橋成須是
再生來長者歸橋工經始未辦而卒時再生在瑞光為化頭偶
至崑山有杜居士知其事謂再生曰石橋之議是再生來今師
法号遠符此記詎非橋工待師而成乎師遂發願以橋工為已
任初然一指繼然一指橋工已就半矣值康熙十四年吳中大
水時既訖于財而謗言復沸橋工幾于中輟蓋渡船之人恨橋
成而廢其業故散布流言以阻之再生遂抽刀于縣前斷左臂

血流如柱，起走數武，復回故處，血暈而仆。衆善信延名醫以萬
金良藥敷之，血止得不死。徐果亭知之，為募之于募撫軍，暨縣
令皆出貲倡首，而橋工次第告成。今惟石關碑亭未完耳。嗚呼
觀和上之所為，知有衆生耳。視喪其臂，猶折槁枝也。今世之高
談性命，傳佛心宗者，固不乏人，而爭名競利，有甚于販夫屠沽
乃自以為真善知識矣。悲夫。

辛未春，予寓薦嚴寺中，狂風怒号，雨如覆盆，靜坐無聊，無端忽
念諸故人死已過半，今日之存者如深秋敗葉，零落蕭條。天各
一方，不能聚首。余已置身兄弟妻子之外，所恃以為性命者，惟
朋友耳。乃所遇又復如此，斯淚亦不能為之墮，心亦不能為之
哀矣。中年以來，苦多忘失。庚午孟夏始有日記，又錄友譜一帙。

記丁卯入都以來之新相知大都三百餘人而丙寅以前而丙午以後所交四方之士其間事關性情學問振古今而軒天地雖海枯石爛精神不可磨滅若夫杯酒言歡意氣推許雖寶鼎有徒亦記一不識十矣每思追錄存歿諸友姓氏錄成一卷置之座右暇時偶一披閱其性情意思之所在歷歷見之目前以代把晤年來奔走風塵略無晷刻今兩窗獨坐無客無書遂取筆研荊神往昔見二十年来案上諸公去來我前如野馬塵埃之奔馳于窗隙也人各有此一種境界但未一靜觀耳盡一日心力憶得三百餘人草錄一紙它日有觸緒而末者可以續入亦非何劉沈謝矣

偶念小雅綿蠻章因念螭螭巢于溪樹不過一枝知止乎其所

不知至矣。吾將止于斯乎？進而觀之。天人上下之間。未嘗有一息之或止也。艸木不止于地也。鳥獸不止于艸木也。人不止于禽獸也。何也？艸木若止于地。胡為乎脫甲而蒙茅也？鳥獸若止于艸木。胡不樹根于土而走陸飛空也？人若止于禽獸。胡為乎不披毛而戴角也？由此觀之。則天固不止于人矣。天之不止于人。猶氣之不居于水下。而火之不伏于地中也。氣居水下。必泡而起。火伏地中。必奮而出。天不止于地。故必學以求通也。聖人因是故。天池為鵬之所止。而王畿為民之所止也。至矣哉！大學之言曰：止于至善。噫！微至善。吾將何止焉？

追憶往昔。念四十年以來。性學問一事。冷煖自知。餘皆蜚蠊耳。語云：鑑于水。不若鑑于人。予曰：鑒于人。不若鑒于己也。又曰：前

車之覆、後車之鑒、予曰、前步之蹟、即後步之戒也、取譬莫近于此矣、遽伯玉行年五十而知四十九年之非、未知今之所是者、非四十九年之非乎、雖然、犬行之數五十、其用四十有九、夫惟此一為無過之地、故曰、五十以學易、可以無大過矣、淵乎、敘乎、吾將語誰、

趙鄆初言、無錫秦留仙之弟、名赤仙、有奴子七人、于甲子年、五人同謀、弔其主、肢體零落、五人皆逃、一顛死于水中、一死于廁、餘三人者、次第擒獲、時值捕獲法實、聞城門者四日、而翠華北來、錫人凶懼、奉旨三人凌遲處死、刑畢、刑人之椿已拔、置室中矣、其夜忽自起立、如人相杵而行、姦者然、下集于地、周行室中、五日夜而後仆、室中之磚皆糜碎如粉、亦千古未有之大

異也。和五人之死皆冤乎。而實非冤。鄭初言予聞之其甥。當必不繆也。他日至梁谿。當詢之秦維生也。

鄭初又言秦赤仙有異相。性奇淫。棄其內而狎比頑童。故及于難。七人皆其所寵也。以千金買寶刀二。一挂牀頭。一置枕畔。時執以自舞。後奴即取此以弑其主。焉有女一人。聰慧絕倫。達陸氏。陸氏置子財。其夫之文章書法。威儀言辭。皆婦自教之。才能為梁谿之冠云。

辛未之春。予至玉峯。盼立齋先生之脈。頗異于常時。蓋立齋本六陽脈。加平人一倍有餘。始得其平。少弱即病矣。今脈如常人。而少弱其病可知。惟左關一部獨旺。其病在肝。余為之書一方。用乳金丹以調胎膈之血。二陳湯以豁其痰。鈎藤以平其肝。黃

連以清其熱、硃砂黑鉛以隊其逆、淡秋石以開其閉、疾其有瘳乎、

立齋先生始患隔食、繼復嘔血、紅黑相間、舉家惶如也、予曰、公肝脈獨旺、食隔不下、皆此物為之祟、黑者瘀血、紅者新血也、瘀者不可留、新者不可吐、一日諸醫磨集、共議一方、平安耳、用石斛、阿膠、丹參等、余竊意立齋久鬱、肝脈不平、且見膈症、連又吐血、則其白中必多瘀積、法當用升麻、紅花、盡吐其白中之瘀血、瘀盡自愈、否則用九蒸大黃為丸、徐上服之、而愈少遲也、富貴人惟喜溫補、聞用此等法、必大驚異、雖虛扁當前、亦不聽信、予亦無如之何也、

与吳修齡論葉字之義、葉乃鐘聲、巖上橫木如鐘、曲者是也、

吳修齡先生論聲音之道頗為有見深以守溫字母劉鑑門法為非以二合翻切收盡諸法立二十四條以盡諸聲之變亦可謂振古人豪矣然以二合為忌狹門乃實不知二合之奧理以諧聲通翻切而立法太交實無異于劉鑑若取其書刪之附予音韻書後亦可脩中華翻切之一法其言曰聖人言治平之道必本之身審聲之士顧可外其身以求用乎作聲有鼻腭喉舌齒唇之六體竭耳目以自審六體所作之聲可以纖數不混其法有二曰二合曰翻切二合乃佛法秘密中事字聲之晦昧者合兩字之聲為一聲以顯之最為親切如多翁合成東字也翻切大同而小異翻之多者有二十餘聲切聲有二百之外以摩盪之法行之可得翻切千數如多翻宗切登翻翁切都翻風切

東字二合如以父母求其人必無第二翻切如以兄弟求其人
或妻要求其人不能不多也與二合同條而稍異者又有切身
之法乃譯場中所立有東字乃可合多第二字以顯之并無東
字將何以顯于是切身之法生焉合二字之聲以為聲即合二
字之形以為字也如丁也為地丁可為可是也翻切為震旦之
法顧之推以為三國時孫炎所作見王肅傳中近日顧炎武以為左
傳之鞠窮為弓勾讀為穀己是翻切皆未寫源說文萬言諧聲
者八千其中自成聲者十之一餘九皆以翻切得聲者也苟無
翻切字內但有二千字何以周用八千字中諧本聲諧四聲諧
翻聲諧切聲輩凡有二十四條朗然可據此豈先有字後立聲
乎翻切必出于始制文字者形聲一時所就耳東漢為煬帝諱

改隆慮為林慮。隆林一翻故也。周易兼義反洛詰釋之皆言馬
鄭已有翻切而未盛行。其曰孫炎就所見者言之耳。炎書不傳。
而所立翻切之名最為精當。昔人之丁顛寅言雖未成書。翻法
甚密。六朝人能通翻詰。史冊載之。唐高宗有通乾天窮之選。李
陽冰云。果不從自得聲。從創省也。德宗時有任饒調甜珍。張籍
鑑之翻皆灼然不謬。守溫作字母三十有大翻法。遂壞。後人著
述如林。皆醉以狂泉者也。又有言翻即切。切即翻者。夫既即一
多翁。多皆可得。東和天地即一陰陽。即一人物。皆廢矣。梓
人作博子。先作長條。乃為方塊。長條翻也。切則截之為方塊也。
此豈有難解者。而憤至此乎。二合立體為本。翻切旁通為用。
無二合則無以質翻切之。暗誤然二合本能生一切諸聲。而不

能自生其聲，藉翻切以授出之。又二合雖得一字之真聲，而不
旁通諸字，得翻切乃可旁通也。二合翻切二法，猶有不能顯之
聲，不得已而用四聲四呼陰陽切聲四法以助之，十得八九不
知昔之居然自任者，何故二合切身佛家綱要絕非僻書也。儒
生不知神珙守清，清泉佛弟子而茫然，誠不可解。平論昔人著
述，孫涵翻切雖不續密，猶能使近似之聲有功斯道。四呼末于
字母破碎汨亂，而能顯撮口字聲門法為字母四呼所夾束，進
而愈窮，然其局狹音和間合于二合翻切，惟守溫悉爾一物所
立字母一母兼三四翻之聲，誤殺後人，直當投溷者也。夫聲發
于形，不關心事，心有智愚，形無凡聖。列子云：聖人廢心而用形。
知此則牧豎之審聲，與孔孟等矣。又曰：孫赤然翻切之書失傳。

唐有孫勣之唐韵守溫之三十六字母何人之四呼劉鑑之門法餘如司馬君實清泉韓孝彥著述紛然要不出于四家孫愐不知翻經切緯之意廣收雜物金矢一棗四呼如有人摸象僅得一肢以為全體而所得者是真非贗門法如唐肅代之朝行間非無李郭不能專任使身七節變為等夷令出多門終至相州之敗至于守溫直是無知妄作貽毒後人而已予謂先生之論局狹音和二門二合翻切之說暨評論昔人皆稍教確當有功聲韵先生亦嘗自負誇予曰諧聲之道蒼帝而後直至小生獨是于二合說猶未能心知其事也先生雖發悟于華嚴字母而金剛頂大海陀羅尼暨涅槃十四音未嘗寓目于五天梵音半滿字學茫如也二合之中已不辨其多含況三合以上乎

蓋先生于天竺陀羅尼太西蠟話小西天梵書、登天方蒙古女
直諸書、皆未究心、其所為聲韻者、特震旦一隅之學耳、若其合
翻切于諸聲、實發前人所未發、而列門過多、失同割鑿、便蒼帝
本意如此、亦可云漫無紀綱者矣、

修齡有自著書三十餘卷、紀流寇事甚詳、半藏家塾、半在潘次
耕處、

陳青來執贄于予、問為學之方、予言為學先須開拓其心胸、務
令識見廣闊、為第一義、次則于古今興廢沿革禮樂兵革之故、
一一淹貫、心知其事、庶不愧于讀書、若夫尋章摘句、一技一能、
所謂雕蟲之技、壯夫恥為者也、

与青來論趙寒山草篆、予之惡州篆者、非惡寒山之州篆、惡今

人之學寒山者耳。若寒山者，所謂从容于法度之中，故能變化于規矩之外。今人未嘗一日从事于玉筋、執筆、輒擬寒山，所謂學邯鄲之步，未有不失其故態也。

人有不由楷法，竟學章草者乎？無有也。篆籀何反不然邪？辛未夏，諸商人聞江北旱蝗相繼，爭糴米而東。舳艫首尾相銜，蔽江而下。漢江之間，米價日增，而江南依然如故。利之所在，人爭趨之，反貴為賤，翻賤成貴，甚矣。白圭計笑之術，不可不講也。姜西溟有端研一方，長五寸，闊四寸，式製古朴，絕愛之。予昔亦甚賞鑑，近為願華峰醉後，使酒所碎，雖以膠漆附會之，非完璧矣。西溟言及氣，猶填塞白臆也。西溟又言舊有一研，乃天然石子，十倍于此，乃為某人竊去。負士一佳硯，亦不易蓄，可憐哉。

余前閱客座贅語，標云：遊園居士撰，皆記金陵事。余意：遊園必金陵前輩也。問之黃子，卽果出顧陵初手。陵初本姓張，尊公諱國輔，嘉靖中甲科官太守。陵初名起元，戊戌會元，鼎甲，有父名，故其書多可觀。

南潯朱相公有大事記、大政記二書，舊已有版。莊氏因此以成明史賈禍者也。更有續大事記三卷，皆逆案以來事。南潯與蒲州交好，蒲州當國時，一一錄記以成此書，更有列傳數千紙，皆未流布。南潯之孫與陶子師交好，已許借抄矣。明史又獲此秘本，不啻負兒忽發覆藏也。

顧景范家有書曰：三朝紀略，紀泰昌、天啟、崇禎也。未知出何人手，言記載甚詳。

子師言諸省志書多有紀其地之時事者皆當採出以備參考
今廣東通志後一卷已經割出余取而觀之果皆諸書之所未
載者年來郡縣諸志汗牛充棟聚于東海乃無一人能發此竅
徧為搜出今已不及可惜也

西漢言家藏寶晉齋帖二十卷甚佳余向所見只十卷耳他日
過甬東當索觀之

黃子鴻有元豐九域志一部乃毛斧季所藏善本遠勝傳是樓
者

辛續修陝西統志余問以連昌宮故跡亦不辨也查之通志西
安府志皆不見余意其或在東京更檢河南統志亦不見問之
景范云在陝州而方輿紀要不載當必不謬耳

元朗言其尊人欲著春秋八考、一天文、二輿地、三職官、四世族、五禮、六樂、七兵、八刑、惟輿地世族已經成書、後世之沿革皆備載春秋八攷、主意絕佳、若分類而求、尚不止此也。

向予見楚辭曉直一書、能使靈均別開生面、每出一語、石破天驚、雖穿鑿附會不少、然皆能發人神智、閩人黃文煥所著也、予意必予卽族人、詢之果然、卽玉贊之父、予卽之族兄也、前在淮陽、乃當面錯過、予卽言文煥字惟章、号坤五、名進士、明季流寓南都、鼎革後卒于浙中、所著之書、曉直而外、有陶詩析義、杜詩掣碧、批老莊史記等書。

黃漳浦之囚于南都也、洪經略門人山東傅覲光、為江寧同知、字對揚、与坤五友、奉命監視漳浦、問閩人之在江南者、覲光以

坤五對漳浦索宣紙百幅草出閩入浙以來之詩文以半寄坤
五半贈對揚又畫巨松一幅後人刻其原書于池州復有索刻
之于浙江者名大滌函書又合倪鴻寶劉念臺陳臥子集為一
部

東山翁式金同一少年來會子師曰路同文名煒詢之則路文
貞之曾孫也文貞名振飛字見白廣平西周人明季提督漕運
于淮安弘光朝公奉太夫人避居吳而南都已不守矣遂卜居
洞庭之東山有家丁三百人一方賴以保障鄉人至今德之
西思文卽位于福州召公為左都御史丙戌三月駕幸延平公
居寄建寧進太子太師武英殿大學士八月仙霞關陷上倉皇
西幸命公以文淵閣印視師安副公趨赴延平遂與乘輿相失

航海走廣州廣州復陷依國姓于廈門造隆武四年麻用文淵
印頒行戊子六月永祿御極于端州手詔召公公力疾赴命三
年己丑四月道卒于順德享年六十贈太傅諡文貞諱一子中
書舍人夫人王氏守太夫人喪于吳公之喪至自粵一慟嘔血
踰月遂不起己亥十一月也合葬於東山法海塢中男三人長
中舍人澤溥字蘇生次中書舍人澤淳戊戌省墓卒次澤濃奉
思文詔改名太平孫五人長玄齡後改玄鼎澤溥子也同文乃
玄鼎之孫云

次憲言其昔年阻風江上辭告土人趙茂先者因主其家其所
居地屬鎮江府与焦山相值名大港鎮有山曰瞿羊出江岸其
始乃宋藝祖之後南渡後一人居此後成巨族今已二萬餘丁

矣。有總祠一人、族長八人、職之、舉族人之聰明正直者四人、爲評事、復有職勾攝行杖之役者亦八人、祠有祠長、房有房長、族人、有訟不鳴之官、而鳴之祠、評事議之、族長判之、行杖者決之、有干名教犯倫理者、縛而沈之江中、以呈宥無不厭衆心者、後有族人与他姓訐訟、族長請之于宥、判決明允、官民皆服、後遂以爲常、余嘗謂聖人之治天下、自宗法始、宗法不立、民事日煩、天下不可得而治也、余別有專書論其事、今聞趙氏之風、益自信其不謬矣、茂先之父、魁梧奇偉、長七尺餘、日飲酒四五十斤、以爲常、家貲八千金、以飲盡、自言終身曾有二更、不飲酒、以病故耳、鼎革之後、常泛巨舟往來海上、曾遭風飄至一島、閩無居人、見有石橋壯麗、環瑋橋上置一銅盤、徑可二三丈、復有一亭、

範銅為之。有人云名乘仙島橋。乃秦始皇所築。以望安期生者。不知何據。當更考之。後又遇風飄泊既久。時值昏黑。吹入一港中。而帆檣數丈。漫有聲。若与物相觸者。舟亦止而不行矣。迨明視之。舟在山岸石洞中。檣之有聲者。石礙之也。其洞石下垂者。五色陸離。玲瓏萬狀。水皆紺碧。色奇花異。卉備滿山谷。不可名目。後復往求之。不復見矣。

金陵人林大牛。仲雲姪。塏工也。其人多巧思。工琢玉。言製珠之法甚精。碾碎碟為珠形。置大蚌中。養之池內。久則成珠。但開蚌口。法未得其要耳。舊法用碎珠為末。以烏菱壳煎膏。為丸納蚌腹中。久自成珠。此用車渠較為勝之。

張東昇言有監城人韓震。字雷門。自言昌黎之後。能作一丈二

尺大字

鄒初言余淡心所著有汗青餘話却快甚廣皆記明末黨局事此書當極力求之

鄒初誦修齡自序文一聯云隴廩易盡終磨海島之頭側理若窮願爲彭城之背上聯不審所出晤修齡時問之

武曾述閩撫張儀山義僕事武曾向館于儀山故知之甚詳儀山有世僕李國華待之厚而朴素無異寒士家人儀山有刲業在紹興使往守之與鄉紳沈姓者同居沈官得罪于鄉人鄉人毀其居并及李氏遂復歸于閩儀山罷官後憐其忠除其籍使爲民國華服沒如故及將入都使先于浦城具舟楫州縣官以其罷任甚急其事國華急曰主人數萬之貲皆爲它人賠累待

人如此而獲此報天道焉在且未出境人已蔑之余不忍見也
遂四日不食人勸之不應也一夜于鵲首旌竿自縊而死儀山
至浦城撫其尸慟哭而殮之予謂儀山之僕賢于翟公之客矣
既已脫籍為良民方有飛鳥出籠困緝縱壑之樂乃能捨其生
以報主以愧天下之負恩者尤人情之所難也相与感嘆久之
伊任言童西爽嘗為予作畫冊二十八幅藏之久矣昨聞其出
問還命裝裱之廣陵散于今絕矣遂出二冊以視予幅七精妙
絕倫惜尚無人題跋耳猶憶丁卯春予將北上西爽為予作畫
屏一曲予向苦圖本艸者不得其真學者案圖而索茫如也因
謂先生曰予南歸取本艸所載艸木蟲蟲請先生圖之彙為一
冊天下之偉觀止此矣西爽亦慨然許之余南歸而西爽死天

也。

猶憶亡友王寅旭，嘗為予言天元麻理一書，嗤其妄，且曰：曾見有開方者，自中心開至四面者乎？此千古未有之奇也。後予朱姓庵生上見之，其紕繆實甚，真無知妄作也。

大東先生松坪之祖，深有得于西學，曾譯幾何體論、幾何用法、小測全義三書，皆世所未有者。幾何原本有十二卷，徐玄扈所譯者，只前六卷耳。綫則倍矣，體未之及也。原本推論其理，作用全未之及，即幾何要法四卷，刻之于崇禎麻書者，只取有關於麻者，大測二卷，割圓八綫之本也。若三角形、銳角、鈍角諸測法，未之有也。余聞松坪有此三書，如獲異寶，松坪許予已三年矣，當力索之。

与熊占論三禮。頗有入微語。其言曰。出繼之子。惟降弟兄姊妹之服。以儀禮為証。不當并降伯叔諸姑之服。知家礼之非皆確當不易。以所著譯書及諸經論出。以示予。予讀其論孟子決汝漢排淮泗而注之江歟。其能發古之所未發也。

熊占又論今人稱庶祖母之非。經有明文曰。祖庶母。置庶字于母上。以別于祖母也。若置庶字于祖上。是別庶祖于祖矣。天下安有所為庶祖者哉。予聞而甚樂之。為之解頤。

西漢出晉唐小楷一冊視予。則宋榻樂毅論破邪論也。余見宋榻多矣。破邪推此本為第一。乃嘉定程孟陽所收藏者。孟陽西漢皆有題跋。

孟陽題樂毅論云。平生見樂毅論二善本。一為崑山張氏物。其

一澄泉武所藏今在方季康家後十三行洛神賦及東方像贊皆精妙偶從都下購得此本又兼黃庭曹娥可以染之忘老矣壬戌正月偈庵老人書

孟陽題破邪論云小楷帖世所傳模而已其筋骨神彩非真舊本遂無由見以故識真者愈少若唐書中破邪論似此搨平生未一二見也偈庵老人書

西溪跋云樂毅論是右軍書付官奴者正是王氏家法故舊推楷書第一余家藏宋搨寶晉齋所刻最善此本差可伯仲永興破邪論亦舊本此二帖皆程孟陽所收程不以書名其風流故足重也

又云右軍之書樂毅勁筆偏多而婉麗不足永興破邪變為險

峭筋多肉少此晉唐之分界也若不善學之便墮近來王雅宜一種惡道矣此臨池家所以貴于運腕運腕得法下筆自無枯枿之病隱人甲子清明第二日又識

西溪出手卷二一明祝枝山離騷經墨跡一宋搢定武本蘭亭枝山離騷經純本章州其結構轉換多得之孫過庭書誼西溪以為似藏真開余言深以為然自始至終二千餘言無一筆溢出規矩之外絕無平日狂怪怒張之態非此卷幾不識枝山本領矣

允明自跋小楷佳絕跋云東國紙此佳品其筆亦甚好予有而失之使用此寫不啻尚可觀也而美難合騷中語亦世事人情丙戌佚老堂記六十七歲祝允明

王稚宣跋云山居雨雪長林風吼塞堦擁爐紙寫明暎但聞竹
樹淅瀝寒鳥悲哀茗筍時薦展枝山翁離騷經快讀數次真覺
太古以前人也壬辰仲冬廿又三日稚宣道人王寵識

又一跋云余向藏祝京兆書法二卷一用金粟牋書古詩十九
首用筆模大令一為此卷其運用震少有不同要之皆本章艸
誠臨池之神品伯兄簾令傳賞之極謹各藏其一以誌同好
末孟冬前二日弟彥輝敬誌

西溪跋云此書雖本章艸其結構之法多得之藏真余所見枝
山十九首真跡遠不如此脫盡蹊徑獨造天然明一代書法推
枝山第一此帖又枝山第一也且六月因暑展玩終卷遂記之
其宗搨定武本蘭亭卷有高麗國庫收藏印前有唐蕭翼傳辨

才象書非子昂而印皆松雪結搆雖佳其衣褶皆用細筆勾畫絕非文敏筆意此卷本秦辛纘先世家藏後有人以重價購求獻之成容若而此本石刻則藏西溪家西溪于成容若齋中見此卷言及容若遂舉以相贈辛纘云松雪圖後尚有董宗伯跋一紙不知何故割去予曰此不難解割此真跡裝入他頁卷尾辛纘亦跋一紙文甚長後跋亦多俱不及錄矣

王子秀言昔聞薄子珏曾製一鏡能返炤梳竿斗中烏雀壁上可教凡物之在高在深非有蓋覆者皆可照見余思之不能驟通其故必于一處攝光返映如蜃樓之現于海氣中然但其製器之方尚大費思索耳

許激雲楓江人豪俠士能詩向与崔冕牀輩往還其人可知在

金陵與諸游俠同寓有相士密語激雲曰我觀諸少年皆當過鐵者也公胡久與雲耶激雲不解所謂曰頭臨白刃非逞鐵而何激雲懼而辭歸諸少年果皆朱光燦黨以此得免過鐵二字甚新奇其金陵詩數聯云端門有店堪沽酒內殿無牆好種田又云耆老盡參新幕府野人還避舊宮門又云若向西山問遺老依稀只說舊吳宮又云南去婦輕鸞鳳佩北來人重虎狼皮又云自束弓刀看虎去却驚車馬氣繼來似此數聯中原老成尚不易得也當覓其全帙讀之

顧昉滋梁溪人與其弟恆修蕭嘉猷譚洪舟黃斐然武進章我仁吳斗文宣興謝弼臣蔣景文靖江朱式屏輩同究性命之學昉滋弼臣曾受學于宣興湯世調先生先生諱之珂讀高忠憲

遺書悟其微旨潛修三十餘年人無知者常州金廓明先生師事之廓明別号闇齋住靖江縣世調先生去世的滋輩遂以闇齋為師講東杯之學以默認天理為宗旨主靜存養為工夫常結杜靜坐宗夏于庚午中秋嘗就之問學稼躬亦与偕焉的滋為之結七日之期教其默坐體認宗夏恍惚有得稼躬坐久成勞困之致疾自余南歸宗夏隨予南北奔馳曾無晷刻暇前之所得已成唐喪的滋適日復于錫山建學舍一區約諸同志共修靜功余謂的滋正人傑也當此時士之為學者名聞耳詞章而外不復有學乃的滋獨能以身心性命之故闇然自修且能捐重貲募學舍以待同人誠斯世之祥麟威鳳也

○姜勝功有姪清初在李定國中曾至緬國哇哇城余問以往事

及域中風土恨其人愚情言之不甚了了地多番僧精舍滿貯梵書貝葉永明入緬晉藩兵駐孟坑其地人居以板為之上大下小如梳竿之斗然

康甲夫有恙諸公子皆病麻疹從者亦莫能堪湖南人多此症病麻忌食臭并家人皆不得食臭病者不得見臭若犯忌則他日必復病更忌韭誤食韭他日必發九次此理之不可解者

○揭昭儀曾客交趾余問以其地之風土云安南与交趾今分二國安南王今交趾之婿也地產象以象為陳善火攻交鎗為天下最然其人柔弱不堪用也又曰臺灣地向有大肚禮嘉二種番人鄭芝龍始開其地後紅毛國假于鄭氏以開市國姓以金門廈門逼近內地恐不能守遂復取臺灣以建國余今日始知

蔓灣為芝龍所開當更政之于楊涵齋也

壬申夏紫庭失馬遣某覈捕盜同知被盜予笑曰司馬失馬捕盜被盜

偶同紫庭考青綠出霞案本草有空青曾青綠青扁青石胆五條予以法製煉之皆可成精銅幾能亂金也

空青楊梅青也別錄云生益州山谷及越萬山有銅霞銅精薰則生空青其腹中空能化銅鐵鉛錫作金弘景曰越萬屬益州益州諸郡無復有恐久不採之故也今出銅官者色最鮮深出始興者勿如涼州西平郡有空青山亦甚多恭曰出銅霞薰有諸青但空青為難得今出蔚州蘭州宣州梓州宣州者最好塊段細時有復中空者蔚州蘭州者片塊大色極淡無空腹者哉

器曰銅之精華大者即空綠小者即空青也。宗奭曰：真宗嘗詔取空青中有水者，久而方得其楊梅青。信州穴山而取，極難得。庚辛玉冊云：產上饒似鐘乳者佳。大片含紫色，有光彩，次出蜀巖道及代北山，生金坑中，生生不已，為青為丹，有如拳大及卵形者，中空有水，如油，治瘡立效。出銅坑者亦佳。又有楊梅青、石青，皆是一體，而氣有精粗。造化指南曰：曾空二青乃石綠之得道者，均謂之鑛。李時珍曰：方家以藥塗銅物，生青，刮下偽作空青者，終是銅青，非石綠之昇道者也。劉繼莊曰：余昔在杭遇一滿州老人，雙目皆矇，藥不能立時奏效，有貨空青者，索價頗高，甚言其效。滿州人信之，酬以重價，將用之矣。始問之，予曰：此物生銅坑中，必銅精也。銅性能伐肝，有餘之症，自無不愈。今

今公年老而症俱虛，法當用溫補之品。若用此，恐無益有損。聞余言，且信且疑。乃破青取水，先點右目，効則遂用之。一夜大痛，無目睛，爆碎始悔，不用予言，而猶賴余獲全其左目也。後用養肝滋陰之劑，將及一載，左目復明。學者不可不知也。余有一法曰：假空青，用古鏡一圓，以碯沙砥石等分為末，水調塗鏡背，上如錢上，以瓷碗覆之，埋入土中，尺許，必在人走路之下。月餘，取起，則鏡蝕成一窩，中包青綠水少許，用之，与空青無異。何必重價購求石中之水哉？余意此石以法製煉，得銅必多。然未之試也。

曾青，別錄曰：生蜀中山谷及越巂。晉曰：生蜀郡石山，其山有銅。夏曾青出，其陽青者，銅之精。弘景曰：今銅官無曾青，惟出始興。

恭曰出蔚州者好鄂州者次之時珍曰但出銅霞年古即生如黃連相綴又如蚯蚓屎方楞色淡如波斯青黛層層而生打之如金聲者為真造化指南云曾青生銅礦中乃石綠之得道者劉繼莊曰此物予未之見蓋亦石青類也造化指南以此等為石綠之得道者其言怪誕殊可笑見之令人噴飯而時珍亦為此言何邪

綠青即石綠亦曰大綠劉錄曰生山之隕穴中頌曰本經以空青條上云生益州山谷及越嵩山有銅霞此物當是生箕山之隕泉今出韶州信州時珍曰石綠生銅坑中乃銅之祖氣也今人呼為大綠范成大桂海志云石綠銅之苗也出廣西古江有銅霞生石中質如石者名石綠二種脆爛如碎土名泥綠品最

下劉經莊曰石綠以法製煉每兩得銅五錢如金今丹家每以此証人不知此即取礦法也

扁青即石青一曰大青別錄云生朱崖山谷武都朱提弘景曰朱提音殊是在南海中普曰生蜀郡恭曰此即綠青也朱崖以南及林邑扶南舶上來者形塊如拳大武昌者片塊小而色更佳蜀州梓州者形扁作片而色淺時珍曰蘇恭言即綠青非也今之石青是矣楚蜀諸處亦有之而今貨石青者有天青大青西夷回回青種不同而回青尤貴本州所載扁青曾青碧青白青皆其類耳劉經莊曰真老坑佛頭青以法製煉每兩可得真赤金二三錢然真者不易得也

石膽即膽礬別錄云生秦州羌道山谷大石間或羌里句青

恭曰此物出銅霞有之出蒲州虞鄉縣東亭谷窟及薛集窟十
頃曰今惟信州鉛山縣有之生于銅坑中采得煎煉而成又有
自然生者尤為珍貴李時珍曰石胆出蒲州山穴中鴨嘴色者
為上出羗里者色少黑次之信州又次之沈括筆談載鉛山有
苦泉流為澗挹水熬之則成胆礬所熬之釜久亦化為銅也劉
綏莊曰胆礬以水銀製之成精銅与石綠中所分者無異若以
分石綠法分之亦得但甚少此理予尚未究其微也

鳳篆案近余辦理東冲務差詢據船戶云天下所用之礬莫不運
自福寧之砂埕一處海口蓋砂埕山土質天成礬石成之利云今
見此書礬有化胡之法然則福寧一郡不僅產鐵且亦產銅處
矣所惜者不得求取善法以富斯民為可惜耳